

Sa focussar dapli sin il giast svizzer

Grischun Vacanzas: Radunanza generala

DA GION NUTEGN STGIER / ANR

■ **Gnervusità e hectica na sajan betg il recept per vegnir or da la crisa turistica. Guardar en il futur e na laschar pender las alas per puspè vegnir sin la via da success cun il turissem grischun. Quai è stadas las lingias grassas da la radunanza generala.** Lamentims e planschims na sajan en tuts cas betg la dretga via per vegnir danovamain sin ina frastga cun il turissem, ha ditg *Marcel Friberg*, il president da l'organisaziun Grischun Vacanzas en ses pled da bainvegni. La situaziun dal turissem saja bain drammatica, però be cuminaivel saja pussaivel da dumagnar quella sfida per meglierar la situaziun.

Sa posiziunar da nov

Cun esser sa midà ils ultims onns il martgà da vacanzas, cun esser la conjuntura plitost flaivla e cun las decisiuns politicas ed il ferm franc svizzer na far la situaziun pli simpla, ha Grischun Vacanzas reagì. Grazia a la strategia 2017–2020, che sa basa sin trais pitgas, vul l'organisaziun sa posiziunar da nov. Il Grischun dovrà tant ils giasts existents, però er daplis giasts novs. Cun novs products, bike e viandar, ina pli vasta purschida e cun dapli pre-schientscha sin ils portals digitalis duajan



Myriam Keller resta anc fin a la fin d'avust directura ad interim da l'organisaziun Grischun Vacanzas. FOTO G. N. STGIER

vegnir nizzegiads pli bain ils potenzials da commercialisaziun e digitalisaziun. En l'avegnir vegn Grischun Vacanzas cunzunt a tegnair en il focus ils giasts svizzers, tgirar quels anc pli bain, però er cun tschertgar novs partenaris da l'economia e dal turissem. Ultra da quai è la Federaziun svizra da gimnastica cun 370 000

commembers da nov partenaria da Grischun Vacanzas. Grazia a quella collavuraziun spera l'organisaziun turistica sin intgins novs giasts. Ils gieus olimpics 2026 sajan er ina buna occasiun per dar al svilup turistic novs impuls, ha menziunà Friberg, cun la speranza ch'il suveran grischun saja er da quella opiniun.

Reto Fasciati da nov en suprastanza

Sa retratg sco commember da la suprastanza da Grischun Vacanzas è *Reto Gurtner*. El saja stà il davos diesch onns per l'organisaziun in um da gronda valur, in vair cumbattant per il turissem, ina persuna innovativa e lura in turistic che haja adina

vesì ordavant il svilup turistic global, ha punctuà Friberg. Sia forza ed energia per il turissem sajan bunamain irremplazzablas. En suprastanza vegn el remplazzà entras *Reto Fasciati*, il nov directur da la Viafier retica. Confermads en lur uffizis èn vegnids il vicepresident *Andreas Züllig* e *Luis A. Wieser* sco assessur.

Quatter aspects impurtants

Il team da Grischun Vacanzas presta lavur exemplarica, è adina puspè vegnì ditg da la radunanza generala. Cunzunt la lavur da *Myriam Keller*, ella che maina ad interim la direcziun da l'organisaziun, saja indispensabla. Sa preschentà tar l'occurrentza è er il nov directur da Grischun Vacanzas, *Martin Vincenz*. La nova strategia saja per el la clav tar il success e sia finamira saja da vender il Grischun sco product, cun ses vasts e numerus products. Motivaziun, innovaziun, comunicaziun e cooperaziun, quai sajan per el quatter aspects per ir en il futur cun Grischun Vacanzas e cun il turissem, ha menziunà Vincenz. Per *Jon Domenic Parolini*, cusseglier guvernativ e schef dal departament da l'economia publica, èsi da gronda impurtanza da na mancar cun Grischun Vacanzas il contact tar la branscha turistica e lura er dad unir las forzas per ir sin la fiera naziunala ed internaziunala.